



Lucas ex honesta familia natus, & omni genere uirtutum educatus fuit. Is cum ingenio plurimum ualeret, post prima artium rudimenta percepta sese hinc inde ad Academias contulit, & in bonis literis optimè profecit. Inde animum ad Iuris studium conuertit, & suis uigilijs effecit, ut Legum Doctor crearetur. Accedebat & uitæ puritas, & singularis eloquentia. Itaq; Guilhelmus & Fridericus iuniores Saxonie duces eum inter consiliarios receperunt, & res magnas suo nomine expedire iusserunt. Cum etiam anno millesimo quingentesimo sexagesimo secundo Imperij principes Franckoforti cõuenissent, ut Maximilianum Ferdinandi Imperatoris filium Cæsarem designarent, is Lucas principum suorum legatus interfuit, & ob multas corporis & animi uirtutes omnibus bonis innotuit. Anon.